

افتوني...!!

افتوني..

علي حلم يجوز تعيس
من قرن تيس زعق نهار مطعون
انا عندي حفظ لصوت بلادي
ف زمن آتون
وده مش صوت بلادي
ويريتكوا تفتوني
لما مشيوا وفاتوني
والتيس رهوان يفوق سرعه الضوء
شكيت في طريقه الضوء
لما كتموا وعتموا ع الغسل
فجائز يكون سليل من نسل كنعان
السر باين في هيچ البعير كتمان
الوحيد اللي يقدر يطلعني علي القتل
هو هامان
وجائز تكون
فقلي آسف
القصه مش ليوسف ابن يعقوب
اما عل المكتوب
محدث هيفتيك
حلمك ده مش قرآن

افتوني !!

ولا ده عقد قران البيت العتيق
ولا ده موته نهار تحت جفن الليل
عشان يكون ده اقرب تأويل ليك
حلمك مش اكبر
من اشياء كتيرة وحشة في الحلم بتدبر
حسيت بتضليل في الرؤية لحين ماتتفسر
انا كان قدامي مسدود ودامي
مقدرتش ادافع من تقل اقدامي
فتقتل مني النهار
زوار الحلم
خطوا قدام الفتوي اعدامي
كلامهم بيخبي النقم في اللقم
انا آسف
كل عازف بيعرف خبايا النغم
فمن حقي اشك في تعبيرك
لحين م تفتحلي بيرك
وترمي الدلو
انا طالب في منامي العلو
بلادي ماهش عرضه لعتمه جافه
ولا عاشت علي خطر حافه
ف جحر الجرو

افتوني !!

كل البلاد ليها فرو
تحت لمعته ساكنه فاشه
بدأ في تضليل المسار وكسب
الوقت لقدوم اعصار
قلي وفر كلامك وضحك
الضلمه واقفالك عل المحك
وللي دسوا صواع الملك
لسا موجودين
نفس يعقوب النبي موجود بنفس الدين
لكن اللي غاب عنا كان الوحي
فتنهنا في الطريق وسبنا الحي
الخصام والكره لسا في الاخوه
والزمن هو الزمن
اللي ماتت بس هيا تمن النخوه
واغتيال يوسف موجود في نفس السن
لما زن سوء الظن
خلى الدفاع إندفاع نحو الهروب
ساب البراح للتيس يجوب
سليل زليخه خلف قطع القميص
اسلوب العشق اختلف ملوش وريس
الحكم مبقاش في ملك مبجل

افتوني !!

طابور القصاص بيتأجل
ويتراكم
وفي الآخر بردوا بيفوز الملاك
بالمنجل
دنيا ماشيه ف اتجاه الجاه
مبقاش التمني في القوت
قد النجاه
علي قد رجمك يا ابن الزمان
يتوزن هجاه
حتي الرحم بات موعود
عل بتولد دود
بيموت بالطين في اول صباه
واللي بينجب ماس
بيكري لحاس يلمع حذاه
ويدهس كرامته ويجازف
قلتلوا اسف
حلمي يجوز تعيس
لكن تفسيره مازال خسيس

